

## 7. gr.

Rannsóknaráð ríkisins felur að jafnaði einhverjum íslenskum aðila að fylgjast með rannsóknunum. Hinir erlendu vísindamenn skulu þá vinna að rannsóknum sínum í samráði við hann. Áður en leiðangursmenn fara úr landi, skal þessum aðila afhent bráðabirgðagreinargerð um rannsóknirnar.

## 8. gr.

Þegar unnið hefur verið úr niðurstöðum rannsókna, skal Rannsóknaráði send fullnaðarskýrsla í þremur eintökum. Einnig skulu Rannsóknarráði send fimm eintök af öllum greinum, bókum eða kortum, sem gefin eru út varðandi starfsemi leiðangursins.

## 9. gr.

Brot gegn reglugerð þessari varða sviptingu rannsóknarleyfis og fjársektum samkvæmt því, sem lög mæla fyrir um.

## 10. gr.

Reglugerð þessi er sett samkvæmt lögum nr. 48/1965, um almennar náttúru-rannsóknir og Náttúrufræðistofnun Íslands, og lögum nr. 64/1965, um rannsóknir í þágu atvinnuveganna, og öðlast þegar gildi. Jafnframt er úr gildi felld reglugerð nr. 164/1952, um náttúru-rannsóknir erlendra vísindamanna á Íslandi.

*Menntamálaráðuneytið, 25. marz 1968.*

Gylfi Þ. Gíslason.

*Birgir Thorlacius.*

## S A M Þ Y K K T

um stjórn bæjarmálefna Seyðisfjarðarkaupstaðar.

### I. KAFLI

Um skipun bæjarstjórnar og verkefni hennar.

## 1. gr.

Bæjarstjórn Seyðisfjarðar er skipuð 9 bæjarfulltrúum, kjörnum skv. lögum nr. 58/1961.

## 2. gr.

Bæjarstjórn Seyðisfjarðar er almennt í fyrirsvari fyrir bæinn, og skal engu máli, er hann varðar, til lykta ráðið án umsagnar bæjarstjórnar.

Bæjarstjórninni ber að gæta hagsmuna bæjarins í hvívetna og annast þau viðfangsefni, sem henni eru fengin í lögum og reglugerðum, svo og málefni, sem henni eru fengin í samþykktum, er hún hefur sett eða á henni hvíla að öðru leyti.

Meginverkefni hennar eru þessi:

a. Bæjarstjórn fer með yfirstjórn á fjarreiðum bæjarins.

1. Árlega ber bæjarstjórn að gera áætlun um tekjur og gjöld bæjarins fyrir hvert reikningsár (almanaksár), og eigi síðar en í marz mánuði. Í fjárhagsáætlun skal greina í meginatriðum, hvernig fjárveitingu til einstakra stofnana skuli hagað, sbr. b-lið, enn fremur skal greina, hvernig áætlaðar tekjur skiptast.

2. Bæjarstjórn á að hafa yfirumsjón með fjárstjórn bæjarins, með því að tekjur séu innheimtar og greiðslur inntar af hendi í samræmi við það, sem ákveðið er í fjárhagsáætlun. Útgjöld, sem ekki eru lögbundin, samningsbundin eða leiða af fyrri samþykktum bæjarstjórnar, má eigi greiða, nema til komi samþykkt bæjarstjórnar, og að jafnaði skal eigi greiða fé úr bæjarsjóði nema með samþykki bæjarstjóra.
3. Hún hefur yfirumsjón með því, að eignir bæjarins séu tryggilega varðveittar.
4. Bæjarstjórn skal leggja fullnaðarúrskurð á ársreikninga bæjarins, eigi síðar en í júlímánuði ár hvert.
- b. Bæjarstjórn hefur yfirstjórn verklegra framkvæmda bæjarins. Í fjárhagsáætlun kveður hún á um, hvernig verklegum framkvæmdum skuli hagað í meginatriðum á fjárhagsárinu. Hún getur gert heildaráætlanir um framkvæmd tiltekinnna verkefna, er taka yfir lengri tíma, svo og einstök verk, effir því sem ástæða þykir til.
- c. Bæjarstjórn kýs bæjarstjóra, bæjarráð og aðrar nefndir eftir því sem segir í reglugerð þessari eða öðrum samþykktum, svo og endurskoðendur reikninga bæjarins. Enn fremur skipar hún fasta starfsmenn bæjarins og ákveður laun þeirra.
- d. Bæjarstjórn setur reglur um stjórn bæjarmálefna og reglur um meðferð tiltekinnna málefna bæjarins, ákveður gjaldskrár fyrirtækja eftir því sem þörf krefur o. s. frv.

## II. KAFLI

### Fundarsköp bæjarstjórnar.

#### 3. gr.

Á fundi bæjarstjórnar í júnímánuði ár hvert kýs bæjarstjórn sér forseta, svo og 1. og 2. varaforseta úr hópi bæjarfulltrúa til eins árs.

Sá er rétt kjörinn forseti, sem fengið hefur atkvæði meira en helmingis bæjarfulltrúa. Verði þeim atkvæðafjölda ekki náð, skal kjósa að nýju, og skal þá kjósa um þá tvo, sem flest fengu atkvæði. Ef þrír eða fleiri, sem um skyldi kjósa, hafa fengið jafnmörg atkvæði, skal varpa hlutkesti um, hverja tvo skuli kjósa. Verður þá sá réttkjörinn, sem fleiri atkvæði fær, þó hann fái ekki helming atkvæða. Verði atkvæði jöfn ræður hlutkesti.

Aldursforseti gegnir störfum forseta, unz kosinn hefur verið forseti. Ef enginn forseti er viðstaddur á fundi bæjarstjórnar, gegnir aldursforseti forsetastörfum, nema bæjarstjórn ákveði að kjósa sérstakan fundarstjóra í það skipti.

Ef forseti deyr eða verður varanlega forfallaður frá störfum í bæjarstjórn, áður en kjörtími hans er á enda, skal kjósa forseta í hans stað fyrir þann tíma, sem eftir er kjörtímabilsins.

#### 4. gr.

Forseti bæjarstjórnar stjórnar umræðum á fundum hennar. Hann sér um, að fundargerðir séu skipulega færðar í gerðabók, og allar ályktanir séu rétt og nákvæmlega bókaðar.

Forseti sér um, að allt fari löglega og skipulega fram á fundum bæjarstjórnar. Hann úrskurðar um skilning á fundarsköpum, samkvæmt samþykkt þessari, en skjóta má úrskurði hans undir úrlausn bæjarstjórnar.

#### 5. gr.

Bæjarstjórn kýs tvo skrifara úr hópi bæjarfulltrúa til eins árs í senn á sama fundi og forsetakosning fer fram, og skulu þeir kosnir hlutfallskosningu. Skrif-

arar skulu færa gerðabók bæjarstjórnar, nema til þess sé ráðinn sérstakur starfsmaður. Enn fremur skulu þeir telja saman atkvæði, þá er atkvæðagreiðsla fer fram.

## 6. gr.

Heimilt er bæjarstjórn að ráða sérstakan fundarritara utan bæjarstjórnar, sem sér um færslu gerðabókar, og hafa skrifarar í samráði við forseta eftirlit með því, að rétt sé fært til bókar.

Í gerðabók skal þess getið hvar og hvenær fundur sé haldinn, hverjir sitji fundinn og hver sé fundarritari.

Í fundarlok skal lesa upp gerðabók og skulu allir viðstaddir fulltrúar undirrita hana. Hver fulltrúi, sem eigi er samróma hinum, á rétt á því, að ágreiningsálit hans verði ritað fáum orðum í gerðabókina.

## 7. gr.

Bæjarstjórn heldur reglulega fund einu sinni í mánuði, og skal fundur haldinn 1. eða 2. mánudag hvers mánaðar og hefjast kl. 16.00. Heimilt er bæjarstjórn að fella niður fund í júlí og/eða ágúst.

Aukafundi skal halda, samkv. ákvörðun bæjarstjóra, forseta bæjarstjórnar eða ef 3 bæjarfulltrúar hið fæsta krefjast þess.

## 8. gr.

Bæjarstjóri semur dagskrá bæjarstjórnarfundar. Á dagskrá skal taka:

1. hvert það mál, sem fellur undir verkvið bæjarstjórnar, skv. 2. gr. og sbr. 10. gr. laga nr. 58/1961, enda sé þess óskað af bæjarstjóra, bæjarráði, lög-mæltri nefnd eða bæjarfulltrúa, að málið sé á dagskrá tekið;
2. fundargerðir bæjarráðs og annarra lögmæltra nefnda, sem þurfa kunna staðfestingar bæjarstjórnar á ályktunum sínum;
3. lögmæltar kosningar nefnda og starfsmanna, svo og hvert það málefni annað, sem bæjarstjórn á um að fjalla að lögum.

Sá, sem óskar að fá mál tekið á dagskrá eða fyrirspurn svarað, skal tilkynna það bæjarstjóra skriflega eigi síðar en fimmtudag næstan fyrir fund.

Bæjarstjóri skal í síðasta lagi kl. 16.00 tveimur dögum fyrir fund, hafa sent öllum bæjarfulltrúum dagskrá næsta bæjarstjórnarfundar.

Í dagskrá skal tilkynna fundarstað og tíma, þær fundargerðir, sem fyrir fundi liggja, tillögur, sem fram hafa komið og geta annarra þeirra mála, sem um skal fjallað og gera í stuttu máli grein fyrir þeim. Fylgja skulu eftirrit fundargerða, tillagna, svo og annarra gagna, sem geta til upplýsingar orðið um málefni á dagskrá.

Ef ákveðinn verður aukafundur skv. 7. gr. skal að jafnaði boða til hans með dagskrá, er send verði bæjarfulltrúum með eigi minna en 24 st. fyrirvara. Heimilt er þó að boða aukafund með skemmri fyrirvara, enda samþykki bæjarstjórn slíkt, eins og um afbrigði frá fundarskópum væri að ræða.

Mál skulu afgreidd í þeirri röð, sem dagskrá segir, nema bæjarstjórn ákveði, að önnur röð skuli höfð.

Heimilt er að taka mál á dagskrá, þótt ekki sé þess getið í fundarboði, enda samþykki  $\frac{2}{3}$  viðstaddra bæjarfulltrúa þau afbrigði.

## 9. gr.

Bæjarstjórnarfundi skal auglýsa á sama hátt og venja er um opinberar auglýsingar í kaupstaðnum, með a. m. k. 24 st. fyrirvara.

## 10. gr.

Bæjarstjórnarfundir skal halda í heyranda hljóði. Bæjarstjórn getur þó ákveðið að ræða einstök mál fyrir luktum dyrum, t. d. einkamál manna eða mál, sem æskilegt er vegna hagsmuna bæjarins, að rædd séu fyrir luktum dyrum.

Ef tillaga kemur fram um það, að mál skuli rætt fyrir luktum dyrum, skal úr því skorið án umræðna.

Óheimilt er að skýra frá því, sem fram kemur við umræður fyrir luktum dyrum.

Ef áheyrandi á bæjarstjórnarfundir raskar fundarfriði, getur forseti látið vísa honum út.

## 11. gr.

Bæjarstjórn getur enga ályktun gert, nema meira en helmingur bæjarfulltrúa sé viðstaddur fundi. Afl atkvæða ræður úrslitum mála.

Bæjarstjóri og hver bæjarfulltrúi getur borið fram breytingartillögu, viðauka-tillögu eða frávísunartillögu við hvert það mál, sem til umræðu er, og bæjarstjórn á úrskurðarvald um. Skulu slíkar tillögur vera skriflegar, en veita skal forseti fundarmönnum ráðrúm til þess að semja tillögur á fundi, ef þörf krefur.

Ef jafnmörg atkvæði eru með máli og móti, fellur það, nema við kosningar, þá ræður hlutkesti.

Mál má afgreiða með því að samþykkja það eða fella, vísa því frá með einfaldri eða rökstuddri dagskrá, vísa því til afgreiðslu bæjarstjóra eða nefndar eða með því að fresta því.

Forseti sker úr því, hvernig atkvæðagreiðslum um tillögur skuli hagað.

## 12. gr.

Bæjarstjórn afgreiðir mál við eina umræðu nema fjárhagsáætlun bæjarins, árs-reikninga og reglugerðir, sem hljóta skulu staðfestingu ráðherra.

Um þessi mál skulu fram fara tvær umræður og liða ein vika hið skemmsta milli umræðna.

## 13. gr.

Atkvæðagreiðsla fer þannig fram, að bæjarfulltrúi réttir upp aðra höndina. Nafnakall skal hafa, ef forseti ákveður, bæjarstjóri óskar eða 2 bæjarfulltrúar hið fæsta.

Við nafnakall er bæjarfulltrúa skylt að greiða atkvæði, nema hann færi rök fyrir undanfærslu sinni, er forseti metur gild. Ef bæjarfulltrúi vill ekki una úrskurði forseta, má hann skjóta úrskurðinum til bæjarstjórnar, sem sker úr án umræðna.

## 14. gr.

Hver bæjarfulltrúi, sem taka vill til máls, skal óska heimildar forseta.

Að jafnaði skulu menn taka til máls í þeirri röð, sem þeir hafa kvatt sér hljóðs. Heimilt er að víkja frá þessu, ef um er að ræða bæjarstjóra eða framsögumann svo og bæjarfulltrúa, sem gera vill stutta athugasemd eða leiðréttu ummæli um sjálfan hann.

Ef tveir eða fleiri kveðja sér hljóðs samtímis, ákveður forseti í hvaða röð þeir tala.

Bæjarfulltrúi skal standa við sæti sitt, meðan hann talar, nema forseti ákveði annað.

Bæjarstjórn getur heimilað, að maður utan bæjarstjórnar megi tala á bæjarstjórnarfundum, en skylt skal honum þá að gæta í hvivetna fundarskapa.

## 15. gr.

Flutningsmaður tillögu eða framsögumaður má tala þrisvar við hverja umræðu máls, en aðrir bæjarfulltrúar tvisvar. Bæjarfulltrúa er þó heimilt að taka oftari til máls til að bera af sér ámæli eða gera stutta athugasemd við fundarsköp.

## 16. gr.

Bæjarfulltrúi skal beina máli sínu til forseta. Ef bæjarfulltrúi tekur til máls við afgreiðslu á fundargerð nefndar, skal hann í upphafi taka fram, hvaða lið eða liði fundargerðar hann óski að ræða, og má ekki ræða nema eitt mál í einu.

Ekki má lesa prentað mál, nema forseti leyfi.

## 17. gr.

Ef forseti telur umræður dragast úr hófi fram, getur hann lagt til, að ræðutími hvers bæjarfulltrúa megi ekki fara fram úr ákveðinni tímallengd eða umræðum hætt.

Þá getur forseti, hvenær sem er, lagt til, að umræðu skuli lokið á ákveðnum tíma. Ekki má þó takmarka umræðu svo, að hún standi skemur en tvo tíma, meðan nokkur bæjarfulltrúi kveður sér hljóðs.

Bæjarstjórn afgreiðir tillögur forseta, skv. 1. og 2. mgr. umræðulaust. Tveir bæjarfulltrúar hið fæsta geta borið fram slíkar tillögur, og skulu þær einnig afgreiddar umræðulaust.

Ákvæði um takmörkun ræðutíma eiga ekki við, þegar fjallað er um frumvarp að fjárhagsáætlun.

## 18. gr.

Skylt er bæjarfulltrúa að lúta valdi forseta í hvívetna, er að því lítur, að gætt sé góðrar reglu.

Ef bæjarfulltrúi ber aðra menn bríglum eða vikur verulega frá umræðuefninu skal forseti víta hann og nefna þau ummæli, er hann vitir. Ef bæjarfulltrúi er víttur tvisvar á sama fundi, getur forseti lagt til við bæjarstjórn, að hann verði sviptur málfrelsi framfar á þeim fundi. Skal sú tillaga afgreidd umræðulaust.

Ef bæjarfulltrúi hlýðnast ekki úrskurði bæjarstjórnar eða almenn óregla kemur upp á fundi, skal forseti gera hlé um stundarsakir eða ef nauðsyn krefur slíta fundi.

## 19. gr.

Eftir hvern bæjarstjórnarfund skal öllum bæjarfulltrúum sent eftirrit af fundargerð.

## III. KAFLI

## Réttindi og skyldur bæjarfulltrúa.

## 20. gr.

Hverjum bæjarfulltrúa er skylt að sækja fundi bæjarstjórnar nema lögmat forföll hamli.

Honum er skylt að taka að sér þau störf, sem bæjarstjórn felur honum, t. d. forsetastörf, setu í bæjarráði eða öðrum nefndum o. s. frv.

Sá, sem verið hefur forseti bæjarstjórnar, setið í bæjarráði eða annarri nefnd, getur þó skorast undan kosningu jafnlangan tíma og hann hefur haft starfið á hendi.

## 21. gr.

Bæjarfulltrúum er heimilt að kynna sér skjöl bæjarins.

## 22. gr.

Hver bæjarfulltrúi á rétt á tiltekinni þóknun fyrir störf sín í bæjarstjórn.

Eftir hverjar bæjarstjórnarkosningar ákveður bæjarstjórn hver verða skuli þóknun bæjarfulltrúa á næsta kjörtímabili.

## 23. gr.

Ef bæjarfulltrúi, kosinn í nefnd eða til annarra starfa, forfallast um stundarsakir vegna veikinda eða af öðrum ástæðum, á hann rétt á að tilnefna mann af sama lista og hann var kjörinn, til að taka sæti hans á meðan, enda hafi varafulltrúi ekki verið kosinn.

Hafi hann engan tilnefnt, fer um varamenn skv. 2. og 3. mgr. 20. gr. sveitarstjórnarlaga.

## 24. gr.

Bæjarstjórn getur veitt bæjarfulltrúa, sem óskar þess, lausn frá bæjarfulltrúastarfi.

## IV. KAFLI

## Um bæjarráð.

## 25. gr.

Bæjarráð skipa 3 bæjarfulltrúar. Skulu þeir kosnir á fundi bæjarstjórnar í júnímánuði til eins árs í senn, með hlutfallskosningu. Á sama hátt kýs bæjarstjórn 3 varamenn úr sínum hópi. Forfallist bæjarráðsmaður eða hans missi við, tekur sæti hans varamaður á sama lista sem aðalmaður. Sé bæði aðalmaður og varamaður forfallaðir, geta flokkarnir látið fulltrúa sína eða varafulltrúa mæta í þeirra stað.

Bæjarstjórn getur með einfaldri ályktun ákveðið aðra tölu bæjarráðsmanna.

## 26. gr.

Bæjarstjóri á sæti í bæjarráði, má kjósa hann formann þess, enda hefur hann þar málfrelsi og tillögurétt, en atkvæðisrétt því aðeins, að hann sé jafnframt bæjarfulltrúi og kosinn í bæjarráð.

Bæjarráð kýs sér formann og ritara. Sá er rétt kjörinn, sem fær meirihluta atkvæða. Ef tveir fá jöfn atkvæði ræður hlutkesti.

Bæjarráð getur ráðið fundarritara utan bæjarráðs.

## 27. gr.

Bæjarráð heldur fundi einu sinni í viku, og þar að auki ef bæjarstjóri, formaður bæjarráðs eða tveir bæjarráðsmenn óska þess.

Fundir eru lögmatir ef tveir bæjarráðsmenn mæta.

## 28. gr.

Bæjarráð fer ásamt bæjarstjóra með framkvæmdastjórn málefna Seyðisfjarðar-kaupstaðar að því leyti, sem hún er ekki öðrum fengin samkv. lögum, reglugerðum eða sérstökum samþykktum bæjarstjórnar.

## 29. gr.

Bæjarráð hefur eftirtalin mál með höndum, stjórnar þeim og tekur um þau ákvarðanir, sem jafnframt eru tillögur til bæjarstjórnar og þurfa að öðlast samþykki hennar svo gild verði. Þó er bæjarráði heimil fullnaðarákvörðun mála, sem ekki eru veruleg fjárhagsatriði, enda sé eigi ágreiningur í bæjarráði né við bæjarstjóra um slíkar ákvarðanir.

- a. Fjármál: Til þeirra teljast umsjón og stjórn á fjárbag bæjarins, undirbúningur og samning fjárhagsáætlunar, tillögur til úrskurðar á reikningum bæjarins, eftirlit og fyrirkomulag á bókhaldi og innheimtu gjalda.  
Bæjarráð ákveður, hvernig varið skuli fé því, sem ætlað er til verklegra framkvæmda, að því leyti, sem slíkt er ekki tekið fram í fjárhagsáætlun.
- b. Vegamál: Bæjarráð hefur stjórn og umsjón með vegamálum bæjarins, götum, holræsum, vatnsveitu, vatnssölu og götulýsingu, allt eftir nánari ákvörðun bæjarstjórnar og reglugerðum þar að lútandi.
- c. Fasteignamál: Til þeirra teljast umsjón með fasteignum bæjarins, svo sem húseignum, jörðum, mótaki, grjótnámi, slægjum, sandnámi, fjallskilum o. fl., að því leyti, sem ekki er öðruvísi fyrirskipað um þessi mál í lögum og reglugerðum.
- d. Sjúkrahúsmál: Til þeirra teljast stjórn og rekstur á sjúkrahúsi bæjarins í samráði við sjúkrahúslækni, er ávallt skal kveðja á fund er rædd eru málefni sjúkrahússins, en eigi hefur hann atkvæðisrétt.
- e. Brunamál: Til þeirra teljast framkvæmdir á öllum brunamálum bæjarins, samkvæmt lögum og reglugerðum um brunamál og slökkvilið. Slökkviliðsstjóri eða varamaður hans skulu sitja fundi, ef rædd eru brunamál, en eigi hafa þeir atkvæðisrétt.
- f. Framfærslumál: Bæjarráð hefur á hendi stjórn allra framfærslumála Seyðisfjarðarkaupstaðar, undir það heyra elliheimili, barnaleikvöllir, dagheimili, ef slík fyrirtæki eru á staðnum.

- Bæjarstjóri er framfærslustjóri, nema til þess sé ráðinn sérstakur maður.
- g. Önnur mál: Öll önnur mál, sem ekki eru falin sérstökum nefndum í samþykktum um stjórn bæjarmála, eða með sérstakri samþykkt bæjarstjórnar, skulu heyra undir bæjarráð. Auk þess getur bæjarstjórn vísað þeim málum, sem henni sýnist til bæjarráðs, þó þau heyri ekki sérstaklega undir það, þegar þurfa þykir.

30. gr.

Skýlt er starfsmönnum bæjarins að sitja fundi bæjarráðs, þegar til umræðu eru málefni, sem störf þeirra snerta og þess er óskað.

31. gr.

Bæjarráð skal halda sérstakar gerðabækur fyrir hvern flokk mála, sem undir það heyra samkvæmt framanrituðu.

32. gr.

Bæjarstjórn ákveður þóknun fyrir störf bæjarráðs.

## V. KAFLI

### Um kosningar, skipan og starfssvið nefnda.

33. gr.

Á fundi sínum í júní kýs bæjarstjórn eftirtaldar nefndir og starfsmenn, til að fara með tiltekin málefni eftir því sem lög, reglugerðir og samþykktir mæla fyrir um:

Til eins árs:

1. Þrjú menn í bæjarráð og þrjú til vara.
2. Þrjú menn í hafnarnefnd.
3. Kjörstjórnir samkvæmt lögum.
4. Tvo endurskoðendur bæjarreikninga og tvo til vara.

5. Fulltrúa á aðalfund Skipasmíðastöðvar Austfjarða h/f.:
  - a. Einn fyrir bæjarsjóð Seyðisfjarðar.
  - b. Einn fyrir hafnarsjóð Seyðisfjarðar.
6. Fulltrúa og varafulltrúa á aðalfund félagsheimilisins Herðubreið.
7. Þrjú menn í skólanefnd Tónlistarskóla Seyðisfjarðar og þrjú til vara.
8. Fimm menn í atvinnumálanefnd og fimm til vara.  
Til fjögurra ára:
  1. Fimm menn í framtalsnefnd og fimm til vara.
  2. Fjóra menn í stjórn Sjúkrasamlags Seyðisfjarðar og fjóra til vara.
  3. Fimm menn í fræðsluráð og fimm til vara.
  4. Fimm menn í barnaverndarnefnd og fimm til vara.
  5. Einn mann í heilbrigðisnefnd og einn til vara.
  6. Tvo menn í náttúruverndarráð og tvo til vara.
  7. Tvo menn í skólanefnd iðnskóla Seyðisfjarðar og tvo til vara.
  8. Sex menn í áfengisvarnarnefnd og sex til vara.
  9. Fjóra menn í byggingarnefnd og fjóra til vara.
  10. Einn mann í stjórn Styrktarsjóðs Gunnars Th. Oddssonar.
  11. Einn mann í fulltrúaráð Brunabótafélags Íslands og einn til vara.
  12. Einn forðagæzlumann.
  13. Tvo sáttamenn og tvo til vara.
  14. Fulltrúa og varafulltrúa á fundi Sambands sveitarfélaga í Austurlandskjör-  
dæmi.
  15. Fulltrúa og varafulltrúa á landsþing Sambands ísl. sveitarfélaga.
  16. Níu menn í sjó- og verzlunardóm.
  17. Einn mann í skólanefnd Hallormsstaðaskóla og einn til vara.
  18. Þrjú menn í umferðanefnd og þrjú til vara.
  19. Þrjú menn í götunafnanefnd og þrjú til vara.

## 34. gr.

Um skipan nefnda, valdsvið og verksvið fer eftir því, sem ákveðið er í lögum eða samþykktum bæjarstjórnar. Þar sem ekki er um slíkar reglur að ræða, getur bæjarstjórn sett þær. Ekki má fela slíkri nefnd vald, sem bæjarstjórn er fengið að lögum. Þegar kjörtími nefndar er óákveðinn, skal litið svo á, að umboð nefndar-  
manna falli niður, þegar kjörtími bæjarstjórnar er á enda.

## 35. gr.

Allar fastar nefndir bæjarstjórnar skulu færa gerðabækur um störf sín, og skulu gerðir fastanefnda svo nefnda, sem bæjarstjórn setur í einstök mál, lagðar fyrir bæjarstjórn til meðferðar og endanlegrar samþykktar eða synjunar.

Þó getur bæjarstjórn, um leið og hún vísar máli til nefndar, falið henni það til fullnaðarafgreiðslu.

## 36. gr.

Hafnarnefnd skipa 3 menn, samkv. hafnarreglugerð fyrir Seyðisfjarðarkaupstað. Hafnarnefnd annast stjórn og framkvæmdir hafnarmála, þar á meðal eftirlit með höfninni, samkvæmt reglum þeim, sem þar um gilda á hverjum tíma.

## 37. gr.

Kjörstjórnir eru kosnar og þær starfa samkvæmt fyrirmælum gildandi kosningalaga.

## 38. gr.

Framtalsnefnd er skipuð 5 mönnum og 5 til vara. Nefndin er kosin og starfar samkvæmt lögum nr. 51/1964, um tekjustofna sveitarfélaga.

## 39. gr.

Í stjórn Sjúkrasamlags Seyðisfjarðar kýs bæjarstjórn 4 menn og 4 til vara, en formaður er skipaður af ráðherra. Sjúkrasamlagsstjórn hefur með höndum þau mál, er sjúkrasamlagið varðar, samkvæmt lögum þar um.

## 40. gr.

Fræðsluráð er skipað 5 mönnum og 5 til vara. Fræðsluráð hefur umsjón og eftirlit með fræðslumálum bæjarins samkv. lögum þar um. Fræðsluráð hefur á hendi skólanefndarstörf fyrir barnaskóla og skóla gagnfræðastigsins.

## 41. gr.

Barnaverndarnefnd er skipuð 5 mönnum og 5 til vara. Nefndin hefur á hendi eftirlit með uppeldi barna innan 16 ára aldurs og vanþroska og veikra unglinga, sbr. lög um barnavernd.

## 42. gr.

Í heilbrigðisnefnd eru sjálfkjörnir bæjarfógeti, sem er formaður hennar og hér-aðslæknir. Bæjarstjórn kýs einn mann í nefndina og einn til vara. Nefndin starfar samkvæmt lögum og heilbrigðissamþykkt bæjarins.

## 43. gr.

Í náttúruverndarnefnd kýs bæjarstjórn 2 menn og 2 til vara, en bæjarfógetinn í Seyðisfjarðarkaupstað er sjálfkjörinn formaður nefndarinnar, skv. lögum. Nefndin starfar samkv. lögum um náttúruvernd.

## 44. gr.

Þar til breyting verður á iðnfræðslu á Seyðisfjarðarkaupstað, kýs bæjarstjórn 2 menn í skólanefnd iðnskólans og 2 til vara, en formaður nefndarinnar er skipaður af ráðherra.

## 45. gr.

Áfengisvarnarnefnd skipa 7 menn, þar af kýs bæjarstjórn 6 menn og jafnmarga til vara. Ráðherra skipar formann nefndarinnar eftir ábendingu áfengisvarnar-ráðs. Starfssvið nefndarinnar markast af lögum um áfengisvarnir.

## 46. gr.

Byggingarnefnd skipa 4 menn og 4 til vara, auk bæjarstjóra, sem er sjálfkjörinn formaður nefndarinnar lögum samkvæmt.

Byggingarfulltrúa er skylt að sitja fundi byggingarnefndar.

Byggingarnefnd annast byggingarmálefni bæjarins, samkvæmt fyrir-mælum í lögum og samþykktum um þau mál.

Auk þess hefur byggingarnefnd umsjón með lóðum, jörðum, túnleigum o. þ. u. l., og gerir tillögur til bæjarstjórnar um þau mál.

## 47. gr.

Skólanefnd Tónlistarskóla Seyðisfjarðar skipa 3 menn og 3 til vara. Nefndin hefur með höndum stjórn og rekstur tónlistarskólans, fyrir bæjarins hönd.

## 48. gr.

Atvinnumálanefnd skipa 5 menn og 5 til vara. Atvinnumálanefnd skal hafa eftirlit og umsjón með þeim atvinnutækjum er bærinn á eða rekur, einnig skal hún gera tillögur til bæjarstjórnar um atvinnuaukningu, þegar þurfa þykir.

## 49. gr.

Umferðanefnd skal vera bæjarstjórn til ráðuneytis um allt er lýtur að umferðamálum í bænum.

## 50. gr.

Götunafnanefnd skal gera tillögur til bæjarstjórnar um nöfn á götum í bænum.

## VI. KAFLI

## Um bæjarstjóra.

## 51. gr.

Bæjarstjórn ræður bæjarstjóra. Ráðningartími skal að jafnaði vera hinn sami og kjörtímabil bæjarstjórnar.

Heimilt er þó að ráða bæjarstjóra til lengri tíma, en þá er ráðningarsamningur uppsegjanlegur af beggja hálfu með sex mánaða fyrirvara, hvenær sem er eftir að kjörtímabilinu er lokið.

Nú næst ekki meirihluti í bæjarstjórn fyrir ráðningu bæjarstjóra svo að bæjarstjóri er í andstögu við meirihluta bæjarstjórnar, og getur þá ráðherra ákveðið, að bæjarstjórnarkosningar skuli fram fara á ný.

## 52. gr.

Bæjarstjóri hefur á hendi framkvæmd ákvarðana þeirra, sem bæjarstjórn gerir, og framkvæmd á málefnum bæjarins yfirleitt að því leyti, sem bæjarstjórn hefur ekki ákveðið annað um tiltekin mál. Skyld er bæjarstjóra að hafa ákveðinn viðtalstíma og sé hann auglýstur á skrifstofu bæjarins.

## 53. gr.

Bæjarstjóri á sæti á fundi bæjarstjórnar og bæjarráðs og hefur þar sömu réttindi og skyldur sem bæjarfulltrúar, nema annað sé sérstaklega fram tekið í þessari samþykkt. Ekki hefur hann atkvæðisrétt, nema jafnframt sé hann bæjarfulltrúi. Hann hefur óbundið málfrelsi og tillögurétt á fundum bæjarstjórnar og bæjarráðs.

## 54. gr.

Nú samþykkir bæjarstjórn ályktun, sem hefur verulegan kostnað í för með sér, sem ekki hefur verið gert ráð fyrir á gildandi fjárhagsáætlun, og getur bæjarstjóri þá fellt slíka ályktun úr gildi um sinn og skal þessi ákvörðun hans færð í gerðabókina.

Um þetta skal hann svo fljótt sem verða má senda ráðuneytinu skýrslu, og leggur það úrskurð á málið. Bæjarstjóri skal senda bæjarstjórninni eftirrit af skýrslunni, svo að hún geti gert athugasemdir við hana, áður en hún fer til ráðuneytisins.

Þá getur bæjarstjóri skotið til fullnaðarákvörðunar bæjarstjórnar ályktunum bæjarráðs.

55. gr.

Útgjöld, sem ekki eru lögbundin, samningsbundin eða leiða af fyrri samþykkt bæjarstjórnar, má ekki greiða, nema til komi samþykki bæjarstjórnar.

56. gr.

Forfallist bæjarstjóri um lengri tíma, skal bæjarráð setja mann til að gegna störfum hans, en þó aldrei lengur en þrjá mánuði í senn.

## VII. KAFLI

### Endurskoðendur.

57. gr.

Bæjarstjórn kýs tvo endurskoðendur til eins árs í senn og tvo til vara til þess að endurskoða reikninga bæjarins og fyrirtækja hans.

Bæjarfulltrúar eru ekki kjörgengir til þess starfs.

Um framkvæmd endurskoðunar fer eftir ákvæðum d-liðs III. kafla laga nr. 58/1961.

## VIII. KAFLI

### Um starfsmenn bæjarins.

58. gr.

Bæjarstjórn ræður fasta starfsmenn bæjarins og veitir þeim lausn frá störfum, nema vald til slíks sé að lögum fengið öðrum aðilum eða á annan veg mælt fyrir í reglugerð tiltekinna stofnana.

Bæjarstjórn ákveður hvort auglýsa skuli til umsóknar stöður hjá bænum og fyrirtækjum hans, en bæjarstjóri ákveður hvernig auglýsa skuli. Bæjarstjórn getur ákveðið, hver almenn skilyrði skuli gilda um ráðningu í föst störf svo og sérskilyrði, sem gilda skuli um ákveðin störf. Bæjarstjórn getur sett starfsmönnum erindisbréf og kveðið þar á um starfssvið þeirra. Skylt er starfsmönnum að hlíta breytingum á starfssviði sínu, enda missi þeir einiskis af launum sínum við þá breytingu.

59. gr.

Bæjarstjórn ákveður með sérstökum samþykktum, hver störf skuli talin föst störf hjá bænum og fyrirtækjum hans, auk þeirra starfa, sem samkv. lögum og reglugerðum eru talin föst störf.

60. gr.

Nú verður gerður samningur milli bæjarstarfsmanna eða samtaka þeirra annars vegar og kaupstaðarins eða samtaka sveitarfélaga hins vegar um kaup og kjör, og skulu þá kjör fastra starfsmanna bæjarins fylgja þeim kjarasamningi, svo sem við á, þó er óheimilt að rýra kjör starfsmanns til samræmis við samninginn.

61. gr.

Fastir starfsmenn bæjarins og fyrirtækja hans njóta sömu réttinda um orlof og veikindadaga og opinberir starfsmenn, unz gerður er samningur sá, er um getur í 60. gr. Uppsagnarfræstur fastra starfsmanna skal vera þrjú mánuðir.

Samþykkt þessi, sem bæjarstjórn Seyðisfjarðar hefur samið og samþykkt, staðfestist hér með samkvæmt lögum nr. 58 29. marz 1961, til þess að öðlast gildi þegar í stað, og birtist til eftirbreytni öllum þeim sem hlut eiga að máli.

Jafnframt eru úr gildi numin samþykkt um stjórn bæjarmálefna á Seyðisfirði staðfest 20. febrúar 1930, fundarsköp bæjarstjórnarinnar í Seyðisfjarðarkaupstað staðfest sama dag, og samþykkt um bæjarráð fyrir Seyðisfjarðarkaupstað nr. 229 20. desember 1963.

*Félagsmálaráðuneytið, 28. marz 1968.*

F. h. r.

Hjálmar Vilhjálmsson.

*Hallgrímur Dalberg.*

## REGLUGERÐ

fyrir vatnsveitu Austur Landeyjahrepps.

### 1. gr.

Hreppsnefnd Austur Landeyjahrepps hefur einkaleyfi til reksturs vatnsveitu, og sölu vatns í Austur Landeyjahreppi.

### 2. gr.

Hreppsnefnd Austur Landeyja hefur á hendi stjórn vatnsveitunnar, en nefndin getur kosið eða ráðið 1 eða fleiri menn til að annast rekstur veitunnar.

### 3. gr.

Vatnsveitan lætur leggja aðalvatnsæðar um allar Austur Landeyjar, þannig að hver vatnsnotandi hafi greiðan aðgang að tengja við veituna í mest 10 metra fjarlægð frá íbúðarhúsi eða öðru húsi þess í stað, frá þeirri tengingu skal hver vatnsnotandi leggja vatnsæðar í hús sín á sinn kostnað.

### 4. gr.

Enginn má án leyfis leggja vatnsæðar frá aðalvatnsæðum veitunnar. Skyld er húseiganda eða landeiganda að halda vatnsæðum sínum vel við og láta tafarlaust gera við þær, ef leki kemur að þeim eða aðrar bilanir. Hann skal sérstaklega gæta þess að ekki frjósi í þeim. Enginn má setja aflvélar í samband við vatnsveituna, nema með samþykki hreppsnefndar, og með þeim útbúnaði, sem hún telur trygган.

### 5. gr.

Hreppsnefnd getur ákveðið mælingu á vatnsnotkun, ef þörf þykir. Kostnaður sá, sem af því hlýzt, greiðist af vatnsnotanda. Þá getur nefndin látið loka fyrir vatnið vegna viðgerða á vatnsæðum, slíka lokun skal tilkynna fyrirfram ef tök eru á, fullan vatnsskatt ber að greiða þó slík lokun fari fram.

### 6. gr.

Heimilt er að loka fyrir vatn hjá þeim, sem eftir ítrekaða áminningu eyða vatni að óþörfu, vanrækja að gera við bilanir á leiðslum sínum, eða greiða ekki vatnsskatt á réttum tíma.

### 7. gr.

Skyld er landeiganda að leyfa umferð á landi sínu vegna vatnsveitunnar, bæði vegna lagningar og viðhalds. Hver sá, er veldur spjöllum á vatnsveitunni er skyldur að greiða fullar bætur.